



Broj/ Број : 02/2-50-1-13-21/09

Sarajevo/ Сарајево: 26.1.2009. godine

ZAPISNIK

21. sjednice Komisije za vanjsku i trgovinsku politiku, carine, saobraćaj i komunikacije

Doma naroda

Parlamentarne skupštine Bosne i Hercegovine, održane 22.1.2009. godine

Sjednicu Komisije za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH (u daljnjem tekstu: Komisija) sazvala je predsjedavajuća Komisije Alma Čolo.

Sjednici Komisije, u svojstvu članova, prisustvovali su: Alma Čolo, Dušanka Majkić, Adem Ibrahimpašić, Branko Zrno i Slobodan Šaraba, te Nenad Pandurević, sekretar, i Dobrinka Savić, stručni saradnik u Komisiji. Opravdano je odsustvovao Rudo Vidović.

Sjednici su u svojstvu predlagača i izvjestilaca prisustvovali: Biljana Čamur i Suvad Džafić, pomoćnici ministra civilnih poslova BiH, Kojo Koprivica, pomoćnik ministra, i Ismet Šečić, savjetnik u Ministarstvu prometa i komunikacija BiH, Brankica Pandurević, šef Odsjeka za vodne resurse i turizam u Ministarstvu vanjske trgovine i ekonomskih odnosa BiH, Bejta Ramović, šef odsjeka u Ministarstvu finansija i trezora BiH, Marinko Šimunović i Dželal Hasečić, zamjenici generalnog direktora Direkcije za civilno zrakoplovstvo BiH, Elma Bačvić, savjetnik u Ministarstvu vanjskih poslova BiH, Maja Ribar, politički savjetnik u OHR-u, i Zdravko Marinković, zamjenik generalnog sekretara u Vanjskotrgovinskoj komori BiH.

Sjednica Komisije počela je u 12 sati.

Nakon što je konstatirala da postoji kvorum, predsjedavajuća Komisije Alma Čolo za sjednicu je predložila sljedeći

DNEVNI RED

1. Usvajanje Zapisnika 20. sjednice Komisije;
2. Razmatranje Prijedloga zakona o Agenciji za razvoj informacionog društva BiH (ZARID), (prva komisijska faza), predlažać: Vijeće ministara BiH;
3. Razmatranje Prijedloga zakona o zrakoplovstvu BiH (prva komisijska faza), predlažać: Vijeće ministara BiH;
4. Razmatranje Prijedloga zakona o Agenciji za pružanje usluga u zračnoj plovidbi BiH (prva komisijska faza), predlažać: Vijeće ministara BiH;
5. Davanje saglasnosti za ratifikaciju Sporazuma o saradnji u oblasti turizma između Vijeća ministara BiH i Hašemitske Kraljevine Jordan;

6. Davanje saglasnosti za ratifikaciju Sporazuma o vazdušnom saobraćaju između Vijeća ministara BiH i Vijeća ministara Ukrajine;
7. Davanje saglasnosti za ratifikaciju Evropskog ugovora o glavnim unutrašnjim plovim putevima od međunarodnog značaja (AGN);
8. Davanje saglasnosti za ratifikaciju Akata XXIII. kongresa Svjetskog poštanskog saveza, Bukurešt 2004.;
9. Davanje saglasnosti za ratifikaciju Protokola između Vijeća ministara BiH i Vlade Republike Mađarske u vezi sa sukcesijom bilateralnih međunarodnih ugovora zaključenih između Federativne Narodne Republike Jugoslavije/Socijalističke Federativne Republike Jugoslavije i Narodne Republike Mađarske;
10. Davanje saglasnosti za ratifikaciju Nota Sporazuma između Bosne i Hercegovine i Kraljevine Norveške o reviziji sukcesije bilateralnih sporazuma zaključenih između bivše SFRJ i Kraljevine Norveške;
11. Davanje saglasnosti za ratifikaciju Sporazuma o kulturnoj saradnji između Vijeća ministara BiH i Vlade Narodne Republike Kine;
12. Davanje saglasnosti za ratifikaciju Evropske konvencije o zaštiti arheološke baštine (revidirana) iz 1992. godine;
13. Davanje saglasnosti za ratifikaciju Konvencije o zaštiti podvodne kulturne baštine, Pariz, 2. novembra 2001. godine;
14. Davanje saglasnosti za ratifikaciju Okvirne konvencije Vijeća Evrope o vrijednosti kulturne baštine za društvo, Faro, 27. oktobra 2005. godine;
15. Davanje saglasnosti za ratifikaciju Međunarodne konvencije protiv dopinga u sportu, Pariz, 19. oktobra 2005. godine;
16. Davanje saglasnosti za ratifikaciju Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj kao Agencije za realizaciju sredstava Globalnog fonda za okoliš – Projekat upravljanja Neretvom i Trebišnjicom;
17. Razmatranje aktuelne situacije u Radio-televiziji Bosne i Hercegovine, (Dopisi Kolegija Doma naroda Parlamentarne skupštine BiH, broj: 02-50-1-24-19-1/08, od 24.9.2008. i 02-50-1-24-5/08, od 29.10.2008., dopisi predsjedavajućeg Upravnog odbora BHRT, prijemni broj: 01-50-3-1073/08, od 22.9.2008 i 02-50-3-1073/08, od 31.12.2008., dopis člana UOBHRT-a Ahmeda Žilića, prijemni broj: 01/5-50-3-1073-1/08, od 23.09.2008., i Zaključci Predstavničkog doma PS BiH);
18. Razmatranje izvještaja i akata Ministarstva vanjskih poslova BiH:
 - Najava posjete predsjednika Parlamentarne skupštine Vijeća Evrope gosp. Lluisa Marie de Puig BiH;
 - Pismo predsjedavajućeg Narodnog sabora Republike Bugarske sa Završnom Deklaracijom regionalnog programa Bugarske političke škole;
 - Informacija o sastanku Vijeća EU za opće poslove i vanjske odnose, 8. i 9.12.2008. u Briselu;
 - Pismo predsjednika Parlamenta Republike Grčke;
19. Razmatranje izvještaja o aktivnostima Stalne delegacije Parlamentarne skupštine BiH pri Parlamentarnoj skupštini Vijeća Evrope u 2008. godini;
20. Razmatranje izvještaja o međunarodnim aktivnostima komisija i delegacija PSBiH:
 - Izvještaj s godišnjeg zasjedanja Parlamentarne skupštine Centralnoevropske inicijative, Kišinev, Moldavija, 18. novembar 2008.;
 - Informacija o radnoj posjeti članova Zajedničke komisije za odbranu i sigurnost BiH Češkoj Republici, od 12. do 14.11.2008.;
 - Informacija o radnoj posjeti članova Zajedničke komisije za odbranu i sigurnost BiH Ujedinjenom Kraljevstvu Velike Britanije i Sjeverne Irske, od 25. do 28.11.2008.;
 - Izvještaj sa službenog putovanja u Kuvajt – Učešće na trećoj globalnoj konferenciji parlamentaraca o borbi protiv korupcije, od 17. do 20.11.2008.;

- Izvještaj s Trećeg plenarnog zasjedanja Parlamentarne skupštine Mediterana, Monako, od 13. do 15. novembra 2008.;
- Izvještaj s regionalnog okruglog stola "Odnos između parlamenata i javnih revizorskih institucija", Skoplje, 12. i 13. 12. 2008.;
- Izvještaj o zvaničnoj posjeti delegacije Predstavničkog doma PSBiH Parlamentu Bjelorusije, od 7. do 10. 12. 2008.;

21. Razmatranje Prijedloga izvještaja o radu Komisije za 2008. godinu;

22. Razmatranje Prijedloga orijentacionog plana rada Komisije za 2009. godinu;

23. Tekuća pitanja.

- Molba Sektora za međunarodne odnose i protokol za dostavljanje okvirnog pregleda međunarodnih aktivnosti Komisije u 2009. godini.

Predloženi dnevni red usvojen je jednoglasno.

Ad.1. Usvajanje Zapisnika 20. sjednice Komisije.

Zapisnik je usvojen jednoglasno.

Ad.2. Razmatranje Prijedloga zakona o Agenciji za razvoj informacionog društva BiH (ZARID), prva komisijska faza, predlagač: Vijeće ministara BiH

Predsjedavajuća Komisije Alma Čolo konstatirala je da je Prijedlog zakona o Agenciji za razvoj informacionog društva BiH u parlamentarnu porceduru dostavljen 18.8.2008., sa zahtjevom predlagača, tj. Vijeća ministara BiH da se razmatra po osnovnom zakonodavnom postupku. Ustavnopravna komisija Doma naroda Parlamentarne skupštine BiH je, na 27. sjednici, održanoj 21.10.2008., razmatrala Prijedlog zakona i dostavila mišljenje da postoji valjan ustavnopravni osnov za usvajanje navedenog zakona kao i usklađenost sa Ustavom BiH.

Dalje je podsjetila da je Komisija prvi put razmatrala Prijedlog zakona u prvoj komisijskoj fazi na 19. sjednici, održanoj 22.10.2008., kada je nakon rasprave, a na prijedlog članova Komisije iz Republike Srpske, većinom glasova prihvaćen zaključak da se "s ciljem obavljanja dodatnih konsultacija s Vladom Republike Srpske, odgodi izjašnjavanje o principima Prijedloga zakona za narednu sjednicu Komisije".

Predsjedavajuća je informirala prisutne da je Predstavnički dom usvojio Zakon u prvom čitanju na 35. sjednici, održanoj 24.9. i 7. i 8. 10.2008., ali da je nakon toga, također zbog obavljanja dodatnih konsultacija o Prijedlogu zakona, u više navrata na prijedlog nadležne komisije produžavao amandmansku fazu, da bi na nastavku 42. sjednice, održanom 29.12.2008., bili prihvaćeni svi amandmani na zakon usaglašeni na nadležnoj komisiji. Međutim, sam zakon u cijelosti nije dobio potrebnu većinu, tako da je Prijedlog zakona upućen Kolegiju PD na usaglašavanje. Izvještaj Kolegija razmatran je na 44. sjednici Predstavničkog doma, održanoj 21.1.2009., i tom prilikom je Prijedlog zakona usvojen s amandmanima.

Dalje je konstatirala da je, shodno odredbama člana 98. stav (2), dostavljeno mišljenje Direkcije za evropske integracije BiH u kojem je istaknuto da je „analizom primarnih i sekundarnih izvora prava Evropske unije utvrđeno da materija koja se uređuje Prijedlogom zakona nije regulirana pravno obavezujućim aktima Evropske unije“. Međutim, „donošenje Zakona te osnivanje Agencije za razvoj informacionog društva BiH preduslov je za uspostavljanje kvalitetnog razvoja informacionog društva u BiH, što je svakako jedan od prioriteta iz Evropskog partnerstva s Bosnom i Hercegovinom kao i Strategije razvoja informacionog društva u Bosni i Hercegovini“.

Nakon rasprave i uz prisustvo predstavnika predlagača, na 21. sjednici, održanoj 22.1.2009., Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH je, kao nadležna komisija, sa tri glasa „za“ i dva „protiv“, prihvatila principe Prijedloga zakona o Agenciji za razvoj informacionog društva BiH (ZARID).

Ad.3. Razmatranje prijedloga zakona o zrakoplovstvu BiH (prva komisijska faza), predlagač: Vijeće ministara BiH

Ad.4. Razmatranje Prijedloga zakona o Agenciji za pružanje usluga u zračnoj plovidbi BiH (prva komisijska faza), predlagač: Vijeće ministara BiH

Predsjedavajuća Komisije predložila je da se oba prijedloga zakona razmatraju zajedno s obzirom da se njima reguliraju veoma slična pitanja. Prijedlog je jednoglasno prihvaćen. Nakon toga je konstatirala da su Prijedlog zakona o zrakoplovstvu BiH i Prijedlog zakona o Agenciji za pružanje usluga u zračnoj plovidbi BiH dostavljeni u parlamentarnu proceduru 26.11.2008., sa zahtjevom predlagača, Vijeća ministara BiH, da se razmatraju po osnovnom zakonodavnom postupku. Naglasila je da se prijedlozi zakona razmatraju u prvoj komisijskoj fazi, radi davanja mišljenja o principima predloženih zakona. Predstavnički dom PSBiH je na 41. sjednici, održanoj 3.12.2008., usvojio oba ova prijedloga zakona u prvom čitanju.

Dalje je predsjedavajuća istakla da Ustavnopravna komisija Doma naroda Parlamentarne skupštine BiH još nije razmatrala ove prijedloge zakona ali da će to uraditi na 30. sjednici, planiranoj za 26.1.2009., nakon čega će dostaviti mišljenje o ustavnopravnom osnovu i usklađenosti s pravnim sistemom. Podsjetila je prisutne da činjenica da u momentu rasprave o principima zakona nije poznato mišljenje nadležne komisije o ustavnopravnom osnovu nije, prema Poslovniku Doma naroda, smetnja za razmatranje prijedloga zakona u prvoj komisijskoj fazi. Dodala je da se u slučaju oba ova prijedloga zakona radi o pitanjima koja su prema Ustavu BiH eksplicitno u nadležnosti institucija BiH.

Predsjedavajuća je još konstatirala da je, u skladu s članom 98. stav (2) Poslovnika Doma naroda, zatraženo i od Direkcije za evropske integracije BiH dobiveno mišljenje o usklađenosti oba prijedloga zakona sa zakonodavstvom Evropske unije. Zapravo, Direkcija za evropske integracije BiH dostavila je mišljenja koja je dala na traženje Ministarstva prometa i komunikacija BiH u proceduri izrade oba ova zakonska prijedloga. Predsjedavajuća je istakla da se u mišljenjima konstatira da donošenje novog zakona o zrakoplovstvu, odnosno o pružanju usluga u zračnoj plovidbi predstavlja ispunjavanje obaveza koje je BiH preuzela po osnovu ratificiranog Multilateralnog sporazuma o uspostavljanju evropske zajedničke zrakoplovne oblasti (ECAA Sporazum). Pored toga, podsjeća se da ova obaveza proizilazi i iz Evropskog partnerstva i Sporazuma o stabilizaciji i pridruživanju. Međutim, u dostavljenim mišljenjima DEI naglašava da je od momenta zaključivanja ECAA Sporazuma, Evropska unija donijela značajan broj novih propisa kojima se uređuje oblast civilnog zrakoplovstva, tako da je značajan broj propisa, koji su sastavni dio ECAA Sporazuma, ili izmijenjen ili prestao važiti. U svojim mišljenjima DEI navodi u potpunosti pomenute izmjene i dopune, i u tom smislu se sugerira predlagaču zakona da razmotri mogućnost dopune ECAA Sporazuma, te detaljno prouči i uvaži izmjene relevantnog zakonodavstva kako bi novi zakoni bili adekvatno usklađeni s evropskom legislativom. S obzirom na izneseno mišljenje DEI, predsjedavajuća je zatražila od predstavnika predlagača da da uvodno izlaganje a posebno da Komisiji pruži pojašnjenja u smislu usklađenosti oba prijedloga zakona s najnovijom zakonodavnom praksom u oblasti zrakoplovstva u Evropskoj uniji, kao i druge relevantne informacije o predloženim zakonima.

Komisiji se obratio Dželal Hasečić, zamjenik direktora Direkcije za civilno zrakoplovstvo BiH. Podsjetio je da BiH ima Zakon o zrakoplovstvu koji je Evropska komisija ocijenila kao veoma dobar. Međutim, 2006. godine potpisan je Sporazum između BiH i Evropske unije o zajedničkom zračnom nebu koji je stvorio obaveze Bosni i Hercegovini da u dvije faze provede evropsku regulativu u oblasti zrakoplovstva. U Sporazumu je jasno navedeno da BiH mora razdvojiti dvije funkcije, i to: funkciju države kao regulatora koji donosi propise i vrši nadzor nad njihovim provođenjem i onoga ko pruža usluge u zračnom prostoru BiH. To je i razlog zašto se predlažu ova dva zakona koja se danas razmatraju na Komisiji. U nastavku se osvrnuo na mišljenje Direkcije za evropske integracije BiH koje je i njima bilo poznato u toku procedure izrade Prijedloga zakona. U međuvremenu, nakon što su prijedlozi zakona dostavljeni u parlamentarnu proceduru, Evropska unija izvršila je procjenu stanja u oblasti zrakoplovstva u BiH, prije svega sa aspekta predloženih zakona. Eksperti Evropske unije izradili su izvještaj u kojem su konstatirani određeni nedostaci. Predstavnik predlagača istakao je da su na bazi tog izvještaja, u saradnji s parlamentarcima iz Predstavničkog doma, već definirani amandmani koji će biti uloženi u toku amandmanske fazi na oba prijedloga zakona. Zajedno s ovim amandmanima prijedlozi zakona bit će u potpunosti usklađeni s evropskom regulativom. Osvrnuo se na ustavnopravni osnov i istakao da je nadležna komisija Predstavničkog doma dala pozitivno mišljenje te izrazio nadu da će takvo mišljenje dati i Ustavnopravna komisija Doma naroda, pogotovo što se radi o eksplicitnoj ustavnoj nadležnosti institucija BiH.

U svom obraćanju Dušanka Majkić istakla je da je uvijek problematično kada se razmatraju prijedlozi zakona za koje ne postoji mišljenje ustavnopravne komisije. Dalje je dodala da joj je poznato da postoje određena usaglašavanja o ovim zakonima koja su još u toku, te je podsjetila da je nadležna komisija Predstavničkog doma tražila produženje roka u amandmanskoj fazi. Shodno svemu iznesenom, predložila je da i ova komisija zatraži produženje roka, da se sačeka mišljenje Ustavnopravne komisije i da se tek onda ovi prijedlozi zakona razmatraju.

Slobodan Šaraba naglasio je da je za njega uvijek sporan ustavnopravni osnov, posebno ako nije eksplicitno utvrđen članom III. Ustava BiH. Zbog toga on smatra da je za raspravu o svakom zakonskom prijedlogu neophodno da postoji mišljenje Ustavnopravne komisije.

Adem Ibrahimpašić podsjetio da Komisija treba da se izjasni o principima predloženih zakona te da će on podržati principe oba zakona.

Branko Zrno istakao je da je on spreman podržati odgađanje izjašnjavanja, odnosno sačekati mišljenje Ustavnopravne komisije.

Alma Čolo podsjetila je da je sjednica Doma naroda već zakazana i da su ova dva zakonska prijedloga već uvrštena u dnevni red te sjednice te da je Komisija dužna dostaviti mišljenje o principima prijedloga zakona. Pored toga, naglasila je da, prema odredbama Poslovnika Doma naroda, nije neophodno da nadležna komisija prilikom odlučivanja u prvoj fazi radi davanja mišljenja o principima ima mišljenje Ustavnopravne komisije.

Nakon rasprave, u skladu s članom 98. Poslovnika Doma naroda Parlamentarne skupštine BiH, Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH je, s tri glasa „za“ i dva glasa „protiv“, prihvatila principe Prijedloga zakona o zrakoplovstvu BiH. Komisija za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH je, s tri glasa „za“ i dva glasa „protiv“, prihvatila i principe Prijedloga zakona o Agenciji za pružanje usluga u zračnoj plovidbi BiH.

Predsjedavajuća Komisije podsjetila je na traženje nadležne komisije Predstavničkog doma da se produži amandmanska faza za ova dva zakona te u vezi s tim istakla da bi bilo dobro da Komisija predloži Domu naroda da, odmah nakon što prijedlozi zakona budu usvojeni u prvom čitanju, donese i zaključak da se amandmanska faza i u Domu naroda produži. Nakon toga, Komisija je, također s tri glasa „za“ i dva glasa „protiv“, odlučila predložiti Domu naroda da, prilikom usvajanja oba prijedloga zakona u prvom čitanju, donese i sljedeći zaključak: “S obzirom da Predstavnički dom Parlamentarne skupštine BiH još nije završio proceduru usvajanja Prijedloga zakona o zrakoplovstvu BiH, odnosno Prijedloga zakona o Agenciji za pružanje usluga u zračnoj plovodbi BiH produžava se amandmanska faza do 24 sata prije održavanja sjednice Komisije na kojoj će biti razmatrani”.

Ad.5. Davanje saglasnosti za ratifikaciju Sporazuma o saradnji u oblasti turizma između Vijeća ministara BiH i Hašemitske Kraljevine Jordan

Uvodno obrazloženje o Sporazumu o saradnji u oblasti turizma dala je Brankica Pandurević, šef Odsjeka za vodne resurse i turizam iz Ministarstva vanjske trgovine i ekonomskih odnosa BiH. Istakla je da je inicijativa za sklapanje sporazuma u oblasti turizma pokrenuta u januaru 2007. godine, preko ambasade naše zemlje u Jordanu. Ministarstvo vanjske trgovine i ekonomskih odnosa BiH u potpunosti je provelo proceduru u skladu sa Zakonom o postupku zaključivanja i izvršavanja međunarodnih ugovora. Predsjedništvo BiH je na 46. sjednici, održanoj 15. oktobra 2008., donijelo odluku o prihvatanju Sporazuma i imenovalo Mladena Zirojevića, ministra vanjske trgovine i ekonomskih odnosa BiH, za potpisnika Sporazuma. Ministar Zirojević je, 29. oktobra 2008., u Amanu potpisao Sporazum s ministrom turizma i starina Hašemitske Kraljevine Jordan. Nakon toga Sporazum je dostavljen Ministarstvu vanjskih poslova BiH radi upućivanja u proceduru ratificiranja.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma o saradnji u oblasti turizma između Vijeća ministara BiH i Hašemitske Kraljevine Jordan.

Ad.6 Davanje saglasnosti za ratifikaciju Sporazuma o zračnom saobraćaju između Vijeća ministara BiH i Vijeću ministara Ukrajine

Uvodno obrazloženje dao je Ismet Šečić, savjetnik u Ministarstvu prometa i komunikacija BiH. Naglasio je da je ovo ministarstvo prilikom zaključivanja Sporazuma ispoštovalo sve odredbe međunarodnog ugovornog prava, te preporuke Međunarodne organizacije za civilnu avijaciju, kao i odredbe Zakona o postupku zaključivanja i izvršavanja međunarodnih ugovora. Održane su dvije runde pregovora. Prva u Kijevu, a druga u Sarajevu, kada je u fazi usaglašavanja došlo do promjena tehničke prirode. Nakon toga je Vijeće ministara BiH utvrdilo prijedlog odluke o ratifikaciji Sporazuma 11. septembra 2008. Na osnovu Odluke Predsjedništva BiH, Sporazum je potpisao Božo Ljubić, ministar prometa i komunikacija BiH, u Kijevu, 24. juna 2008., nakon čega je upućen Ministarstvu vanjskih poslova radi provođenja procedure ratificiranja.

Nakon izlaganja predstavnika nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma o zračnom saobraćaju između Vijeća ministara BiH i Vijeća ministara Ukrajine.

Ad.7. Davanje saglasnosti za ratifikaciju Evropskog ugovora o glavnim unutrašnjim plovnim putevima od međunarodnog značaja (AGN)

Ad.8. Davanje saglasnosti za ratifikaciju Akata XXIII. kongresa Svjetskog poštanskog saveza, Bukurešt 2004.

Predsjedavajuća Komisije Alma Čolo konstatirala je da nisu prisutni predstavnici Ministarstva prometa i komunikacija BiH koji bi mogli dati mišljenje o ovim međunarodnim ugovorima. Dalje je dodala da su svi članovi Komisije dobili tekst ovih međunarodnih ugovora uz koje postoje obrazloženja, kao i akti Predsjedništva BiH u kojima je navedena procedura koja je prethodila davanju prethodne saglasnosti za ratifikaciju, te predložila da se članovi Komisije izjasne glasanjem.

Članovi Komisije jednoglasno su odlučili predložiti Domu naroda davanje saglasnosti za ratifikaciju

- *Sporazuma Evropskog ugovora o glavnim unutrašnjim plovnim putevima od međunarodnog značaja (AGN);*
- *Akata XXIII. kongresa Svjetskog poštanskog saveza, Bukurešt 2004.*

Ad.9. Davanje saglasnosti za ratifikaciju Protokola između Vijeća ministara BiH i Vlade Republike Mađarske u vezi sa sukcesijom bilateralnih međunarodnih ugovora zaključenih između Federativne Narodne Republike Jugoslavije/Socijalističke Federativne Republike Jugoslavije i Narodne Republike Mađarske

Ad.10. Davanje saglasnosti za ratifikaciju Nota Sporazuma između Bosne i Hercegovine i Kraljevine Norveške o reviziji sukcesije bilateralnih sporazuma zaključenih između bivše SFRJ i Kraljevine Norveške

S obzirom da su dva navedena sporazuma u nadležnosti Ministarstva vanjskih poslova BiH, predsjedavajuća Komisije Alma Čolo predložila je da se razmatraju zajedno. Nakon što je konstatirala da nije prisutan predstavnik Ministarstva vanjskih poslova BiH, predsjedavajuća Komisije istakla je da uz ove sporazume postoji pismo Ministarstva vanjskih poslova BiH u kojem je navedena sva procedura koja je prošla, te da je Vijeće ministara BiH na 67. sjednici, održanoj u novembru 2008., utvrdilo Prijedlog odluke o ratifikaciji i za jedan i za drugi sporazum. Članovi Komisije prihvatili su da razmatraju ova dva sporazuma i bez prisustva predlagача, *nakon čega je jednoglasno donesena odluka da se predloži Domu naroda davanje saglasnosti za ratifikaciju:*

- *Protokola između Vijeća ministara BiH i Vlade Republike Mađarske u vezi sa sukcesijom bilateralnih međunarodnih ugovora zaključenih između Federativne Narodne Republike Jugoslavije/Socijalističke Federativne Republike Jugoslavije i Narodne Republike Mađarske; i*
- *Nota Sporazuma između Bosne i Hercegovine i Kraljevine Norveške o reviziji sukcesije bilateralnih sporazuma zaključenih između bivše SFRJ i Kraljevine Norveške.*

Ad.11. Davanje saglasnosti za ratifikaciju Sporazuma o kulturnoj saradnji između Vijeća ministara BiH i Vlade Narodne Republike Kine

Biljana Čamur, pomoćnik ministra civilnih poslova BiH, dala je obrazloženje pomenutog sporazuma. Istakla je da je cilj zaključivanja ovog sporazuma unapređenje saradnje naroda dviju zemalja u oblasti kulture, obrazovanja i sporta. Vijeće ministara BiH je, na 67. sjednici, održanoj 26. novembra 2008., utvrdilo Prijedlog odluke o ratifikaciji navedenog sporazuma i dostavilo ga u proceduru u skladu sa Zakonom o postupku zaključivanja i izvršavanja međunarodnih ugovora. Predstavnica nadležnog ministarstva predložila je članovima Komisije da daju saglasnost za ratifikaciju ovog sporazuma.

Članovi Komisije jednoglasno su odlučili predložiti Domu naroda davanje saglasnosti za ratifikaciju Sporazuma o saradnji u oblasti kulture između Vijeća ministara BiH i Vlade Narodne Republike Kine.

Ad.12. Davanje saglasnosti za ratifikaciju Evropske konvencije o zaštiti arheološke baštine (revidirana) iz 1992. godine

Ad.13. Davanje saglasnosti za ratifikaciju Konvencije o zaštiti podvodne kulturne baštine, Pariz, 2. novembra 2001. godine

Ad.14. Davanje saglasnosti za ratifikaciju Okvirne konvencije Vijeća Evrope o vrijednosti kulturne baštine za društvo, Faro, 27. oktobra 2005. godine

S obzirom da su sporazumi pod tač.12. ,13. i 14. u nadležnosti Ministarstva civilnih poslova BiH i da se odnose na srodna pitanja, prihvaćen je prijedlog predsjedavajuće Komisije da se razmatraju zajedno, te je uvodno obrazloženje dala Biljana Čamur, pomoćnik ministra civilnih poslova BiH. Istakla je da su Evropska konvencija o zaštiti arheološke baštine i Okvirna konvencija Vijeća Evrope o vrijednosti kulturne baštine za društvo konvencije Vijeća Evrope, te da Bosna i Hercegovina kao članica te organizacije ima obavezu da primijeni ove konvencije kojima se regulira oblast kulturnog naslijeđa, posebno imajući u vidu njen značaj.

Konvencija o zaštiti podvodne kulturne baštine, Pariz, 2. novembra 2001., konvencija je UNESCO –a kojom pokazujemo našu spremnost da prihvatimo međunarodne standarde kojima se regulira ova oblast i da prema tim standardima uredimo naše propise u njoj.

Nakon izlaganja predstavnice nadležnog ministarstva, članovi Komisije jednoglasno su odlučili predložiti Domu naroda davanje saglasnosti za ratifikaciju:

- *Evropske konvencije o zaštiti arheološke baštine (revidirana) iz 1992. godine;*
- *Konvencije o zaštiti podvodne kulturne baštine, Pariz, 2. novembra 2001. godine;*
- *Okvirne konvencije Vijeća Evrope o vrijednosti kulturne baštine za društvo, Faro, 27. oktobra 2005.godine.*

Ad.15. Davanje saglasnosti za ratifikaciju Međunarodne konvencije protiv dopinga u sportu, Pariz, 19. oktobra 2005. godine

Suvad Džafić, pomoćnik ministra civilnih poslova BiH, dao je uvodno obrazloženje za Međunarodnu konvenciju protiv dopinga u sportu. Naglasio je da se radi o konvenciji UNESCO-a, te da je Vijeće ministara BiH dalo mišljenje kojim podržava pristupanje Bosne i Hercegovine navedenoj konvenciji. Razlozi za pristupanje su sprečavanje i borba protiv dopinga u sportu, te saradnja u vrhunskoj kontroli i utvrđivanje i usklađivanje standarda iz ove oblasti sa svjetskim standardima.

Članovi Komisije jednoglasno su odlučili predložiti Domu naroda davanje saglasnosti za ratifikaciju Međunarodne konvencije protiv dopinga u sportu, Pariz, 19. oktobra 2005. godine.

Ad.16. Davanje saglasnosti za ratifikaciju Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj kao Agencije za realizaciju sredstava Globalnog fonda za okoliš – Projekat upravljanja Neretvom i Trebišnjicom

Uvodno obrazloženje o Sporazumu dala je Bejta Ramović, šef odsjeka u Ministarstvu finansija i trezora BiH. Istakla je da se radi o međudržavnom sporazumu, grantu Globalnog fonda za okoliš u iznosu od osam miliona dolara, od čega šest miliona pripada Bosni i Hercegovini, a dva miliona dolara Republici Hrvatskoj. Cilj projekta je poboljšanje upravljanja vodnim resursima, zatim poboljšanje ekosistema biodiverziteta vodnih resursa, prioritetne investicije radi smanjenja zagađenja vode a sve s ciljem pravične raspodjele određenog kvaliteta vode među korisnicima. Grant sredstva dijele se u okviru Bosne i Hercegovine - za Federaciju BiH 2,5 mil.dolara a za Republiku Srpsku 1,7 mil. dolara, što će realizirati jedinice za implementaciju u entitetima. Ministarstvo vanjske trgovine i ekonomskih odnosa BiH distribuirat će iznos od 1.8 mil.dolara. Budžeti entiteta također će dati doprinos u distribuciji tokom pet godina trajanja granta - Federacija BiH u iznosu od 2,3 miliona dolara , a Republika Srpska iznos od 2,2 miliona dolara.

Slobodan Šaraba je u svom izlaganju istakao da se on protivi ovom sporazumu zato što se riječni slivovi Neretve i Trebišnjice u Sporazumu tretiraju zapravo kao jedan. Prema njegovom mišljenju, radi se o dva odvojena riječna sliva i istakao da smatra da se u tekstu Sporazuma mora jasno naznačiti da se radi o dva odvojena riječna sliva. U protivnom, ako se Sporazum prihvati u predloženom tekstu, stvaraju se preduslovi da se s ova dva riječna sliva upravlja jedinstveno. Podsjetio je da je Zakonom o vodama Republike Srpske predviđeno da se za upravljanje vodama Trebišnjice formira posebna agencija, a upravljanje riječnim slivom Neretve jasno je definirano propisima Federacije BiH. Ponovio je da se on protivi ovom sporazumu jer smatra da se ova dva riječna sliva moraju odvojeno tretirati. Podsjetio je da je priča o ovom sporazumu počela 2004. godine i da je tada jasno traženo i zahtijevano da se ova dva sliva tretiraju odvojeno te da je to tada bilo prihvaćeno. Dodao je da, istina, ima i onih koji smatraju da slivovi ove dvije rijeke treba da se tretiraju jedinstveno jer vode Trebišnjice vještačkim putem preko Hidroelektrane Čapljina dolaze do sliva Neretve.

Predsjedavajuća Čolo podsjetila je da se iz dostavljenih materijala vidi da je Sporazum već potpisan. Sporazum je 15. septembra potpisao ministar Vrankić i Komisija ne može uticati na izmjene u Sporazumu. Posebno je naglasila da bi bila velika šteta odbijati sredstva Međunarodne banke za obnovu i razvoj koja će biti osigurana na osnovu ovog sporazuma.

Predstavnica Ministarstva finansija i trezora BiH Bejta Ramović dodala je da su u delegaciju Bosne i Hercegovine prilikom pregovora o zaključivanju ovog sporazuma bili uključeni i predstavnici Republici Srpske. U zapisniku koji je potpisao i predstavnik Republike Srpske i koji je prethodio potpisivanju Sporazuma konstatirano je da se radi o dva odvojena riječna sliva. Izmijenjen je i naziv projekta samo u „Projekat Neretva i Trebišnjica“ kako bi se izbjegli mogući nesporazumi. Dalje je dodala da su potpisani i projektni sporazumi s entitetima a u ime Republike Srpske projektni sporazum potpisao je ministar Radivoje Bratić. Naglasila je da se o ovome o čemu govori Šaraba vodilo računa i da je moguće da se radi o grešci u prijevodu.

Slobodan Šaraba ponovo je uzeo riječ i istakao da je, ako se radi o grešci, onda to suštinska greška i da ovakav tekst on ne može prihvatiti. Ponovio je da u Sporazumu jasno piše „sliv Neretve i Trebišnjice“ i da tako stoji na strani 7. te na strani 24. Dodao je da on zna da postoji nastojanje da se napravi jedna agencija i jedno upravljanje s dva riječna sliva.

Branko Zrno rekao je kako smatra da se projekat upravljanja Neretvom i Trebišnjicom može tumačiti na oba načina i kao jedinstveno i kao razdvojeno upravljanje. Predložio je da Komisija predloži Domu naroda davanje saglasnosti za ratifikaciju a da se do sjednice Doma naroda pribavi original teksta na engleskom i iz njega vidi o čemu se radi.

Adem Ibrahimpašić podsjetio je da se radi o grantu od 6 miliona dolara i da bilo bi krajnje neodgovorno ne uzeti ta sredstva, dozvoljavajući da je Šaraba u pravu, odnosno da se radi o dva odvojena riječna sliva.

Predsjedavajuća Komisije predložila je da se Domu naroda predloži da da saglasnost za ratifikaciju a da do sjednice Doma naroda Ministarstvo finansija i trezora BiH dostavi informaciju o tome kako se tretiraju riječni slivovi Neretve i Trebišnjice u ovom sporazumu. *Nakon toga su članovi Komisije jednoglasno odlučili predložiti Domu naroda davanje saglasnosti za ratifikaciju Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj kao Agencije za realizaciju sredstava Globalnog fonda za okoliš – Projekat upravljanja Neretvom i Trebišnjicom.*

Na prijedlog predsjedavajuće, članovi Komisije jednoglasno su donijeli i sljedeći zaključak:

„Potrebno je da Ministarstvo finansija i trezora BiH, kao nadležno ministarstvo za zaključivanje ovog sporazuma, najkasnije do sjednice Doma naroda, 29.1.2009., dostavi pisanu informaciju da li se slivovi rijeka Neretve i Trebišnjice u Sporazumu tretiraju kao jedan riječni sliv ili kao dva odvojena riječna sliva, s obzirom da iz teksta Sporazuma na službenim jezicima Bosne i Hercegovine proizilazi da se radi o jednom slivu, što je, prema mišljenju pojedinih članova Komisije, neprihvatljivo“.

Ad.17. Razmatranje aktuelne situacije u Radio-televiziji Bosne i Hercegovine, (Dopisi Kolegija Doma naroda Parlamentarne skupštine BiH, broj: 02-50-1-24-19-1/08, od 24.9.2008. i 02-50-1-24-5/08, od 29.10.2008., dopisi predsjedavajućeg Upravnog odbora BHRT-a, prijemni broj: 01-50-3-1073/08, od 22.9.2008 i 02-50-3-1073/08, od 31.12.2008., dopis člana UOBHRT-a Ahmeda Žilića, prijemni broj: 01/5-50-3-1073-1/08, od 23.9.2008., i Zaključci Predstavničkog doma PSBiH)

Predsjedavajuća Komisije podsjetila je da je Kolegij Doma naroda Parlamentarne skupštine BiH dostavio Komisiji za vanjsku i trgovinsku politiku, carine, saobraćaj i komunikacije Doma naroda Parlamentarne skupštine BiH, na daljnje razmatranje, dopis (tadašnjeg) generalnog direktora BHRT-a, Mehmeda Agovića o aktuelnoj situaciji u Radio-televiziji Bosne i Hercegovine i Preporuku ombudsmena za ljudska prava BiH Safeta Pašića u vezi s odlukama sa 32. sjednice Upravnog odbora Radio-televizije BiH, održane 12. i 13.9.2008., na kojoj je, između ostalog, donesena odluka o smjeni generalnog direktora Radio-televizije BiH.

Dalje je predsjedavajuća podsjetila da je Komisija prvi put uzela u razmatranje dopise o aktuelnoj situaciji u RTVBiH povodom smjene generalnog direktora, na 19. sjednici, održanoj 22.10.2008., kada je, prilikom utvrđivanja dnevnog reda sjednice, zaključeno da je potrebno da se kompletiraju svi materijali o stanju u Radio-televiziji BiH koji su dostavljeni Parlamentarnoj skupštini BiH pa da se tek onda o tome raspravlja na sjednici Komisije. Dodala je da su, osim navedenih dopisa koje je Komisiji dostavio Kolegij Doma naroda PSBiH, Parlamentarnoj skupštini BiH dostavljena još dva dopisa o aktuelnoj situaciji u Radio-televiziji BiH, i to: dopis predsjedavajućeg Upravnog odbora Radio-televizije BiH i dopis člana Upravnog odbora Radio-televizije BiH Ahmeda Žilića. Oba dopisa odnose se na smjenu generalnog direktora Radio-televizije BiH. U međuvremenu je, 31.12.2008., Parlamentarnoj skupštini BiH dostavljen i dopis predsjedavajućeg Upravnog odbora Radio-televizije BiH, uz koji su dostavljeni Izvještaj o radu i poslovanju Radio-televizije BiH za 2007. i Izvještaj o reviziji poslovanja Radio-televizije BiH za 2007.godine. Informirala je da je Izvještaj o reviziji poslovanja razmatrala Komisija za finansije i budžet Doma naroda, kao nadležna komisija, na 27. sjednici, održanoj 20.1.2009.

Predsjedavajuća je prisutne podsjetila i na dogovor sa 20. sjednice Komisije, održane 3.12.2008. kada je dogovoreno da se tačka dnevnog reda formulira kao: Razmatranje aktuelne situacije u BHRT-u i da se ne razmatra posebno nego u okviru dnevnog reda sa svim drugim tačkama za koje se do održavanja sjednice steknu uslovi za razmatranje. Također, dogovoreno je da se u vezi s ovom tačkom na sjednicu ne poziva niko od predstavnika BHRT-a ni drugih institucija te da se na sjednici razmatraju svi materijali koji su dostavljeni PSBiH u vezi s posljednjim zbivanjima u BHRT-u (od odluke Upravnog odbora BHRT-a o smjeni generalnog direktora).

Nakon rasprave Komisija je na 21. sjednici, održanoj 22.1.2009., zaključila sljedeće:

1. Komisija je primila k znanju dostavljene dopise koji se odnose na smjenu generalnog direktora i aktuelnu situaciju u Radio-televiziji BiH, te zaključila da ne može zauzimati stavove o regularnosti, odnosno neregularnosti postupka smjenjivanja generalnog direktora RTVBiH, s obzirom da je u toku sudski postupak u kojem će biti utvrđene sve relevantne činjenice koje se odnose na taj slučaj;
2. Na narednoj sjednici Komisija će raspravljati o Izvještaju o radu i poslovanju Radio-televizije BiH za 2007. godinu, i o tome dostaviti mišljenje Kolegiju Doma naroda PSBiH.

Osim toga, na sjednici se raspravljalo o tome da li i koga u ime Radio-televizije BiH pozvati da prisustvuje sjednici. Izneseno je više prijedloga od toga da se ne poziva niko do toga da se pozovu svi članovi Upravnog odbora i menadžment preduzeća. *Nakon rasprave, većinom glasova, sa četiri glasa „za“ i jednim glasom „protiv“, odlučeno je da se na sjednicu ne poziva niko od predstavnika Radio-televizije BiH.*

Ad.18 Razmatranje izvještaja i akata Ministarstva vanjskih poslova BiH:

- **Najava posjete predsjednika Parlamentarne skupštine Vijeća Evrope Lluisa Marie de Puiga BiH;**

Članovima Komisije dostavljen je program posjete predsjednika Parlamentarne skupštine Vijeća Evrope Lluisa Marie de Puiga BiH koji je jednoglasno primljen k znanju.

- **Pismo predsjedavajućeg Narodnog sabora Republike Bugarske sa Završnom deklaracijom regionalnog programa Bugarske političke škole;**

Komisija je jednoglasno primila k znanju pismo predsjedavajućeg Narodnog sabora Republike Bugarske sa Završnom deklaracijom regionalnog programa Bugarske političke škole.

- **Informacija o sastanku Vijeća EU za opće poslove i vanjske odnose, 8. i 9.12.2008. u Briselu;**

Dodatno obrazloženje o sastanku Vijeća EU za opće poslove dala je Elma Bačvić, savjetnik u Ministarstvu vanjskih poslova BiH. Istakla je da se radi o redovnom mjesečnom sastanku, te da je, pored ostalih vanjskopolitičkih pitanja, Vijeće razmatralo Strategiju proširenja i Izvještaje o napretku. Vijeće je istaklo svoju punu podršku evropskoj perspektivi zemalja Zapadnog Balkana, koja je i dalje od ključne važnosti za stabilnost, pomirenje i budućnost regiona. Vijeće je podsjetilo da će preostale zemlje kandidati Zapadnog Balkana dobiti kandidatski status prema vlastitim zaslugama, tj. ako ostvare stabilan napredak u ekonomskim i političkim reformama. Vijeće je dalo podršku liberalizaciji viznog režima i pozvalo ove zemlje na ispunjavanje ovih uslova.

Usvojen je zaključak o Bosni i Hercegovini u kojem je pozdravljeno potpisivanje SSP-a, ali je izražena i zabrinutost zbog razvoja političke situacije. Istaknuta je potreba za zajedničkom vizijom budućnosti zemlje, vladavinom prava, jačanjem institucija i administrativnih kapaciteta, kao i borbom protiv korupcije i organiziranog kriminala. Vijeće poziva vlasti Bosne i Hercegovine da pojačaju svoje napore u ispunjavanju tih ciljeva i uslova. Vijeće je usvojilo i zaključke o proširenju i konstatiralo da je EU preduzela korake kako bi poboljšala kvalitet procesa proširenja .

Nakon izlaganja predstavnice Ministarstva vanjskih poslova BiH, članovi Komisije jednoglasno su primili k znanju Informacija o sastanku Vijeća EU za opće poslove i vanjske odnose, 8. i 9.12.2008. u Briselu.

- Pismo predsjednika Parlamenta Republike Grčke;

Predsjedavajuća Čolo naglasila je da je ovo pismo predsjednika Parlamenta Republike Grčke upućeno članovima našeg kolegija, a vezano je za preduzimanje diplomatskih aktivnosti radi smirivanja situacije na Bliskom istoku. Naglasila je da se Kolegij već oglašio i preduzeo određene aktivnosti u skladu s ovim pismom. *Nakon obrazloženja predsjedavajuće, članovi Komisije jednoglasno su primili k znanju pismo predsjednika Parlamenta Republike Grčke.*

Ad.19. Razmatranje Izvještaja o aktivnostima Stalne delegacije Parlamentarne skupštine BiH pri Parlamentarnoj skupštini Vijeća Evrope u 2008. godini

Predsjedavajuća Komisije konstatirala je da su svi članovi dobili izvještaj o aktivnostima stalne delegacije Parlamentarne skupštine BiH pri Parlamentarnoj skupštini Vijeća Evrope u 2008. godini, u kojoj je pet stalnih članova i pet zamjenika. Naglasila je da je izvještaj razmatran i usvojen u Predstavničkom domu PSBiH. Pritom su usvojeni određeni zaključci vezani za smanjenje troškova međunarodnih putovanja, te da bi s tim ciljem trebalo smanjiti broj članova koji učestvuju u radu Parlamentarne skupštine Vijeće Evrope. Predsjedavajuća je izrazila svoje neslaganje smatrajući da je to neutemeljeno. Navela je da ona kao zamjenik člana delegacije PSBiH u Parlamentarnoj skupštini Vijeća Evrope ali i član Komiteta za pravna pitanja mora prisustvovati sjednicama Komiteta, a da je apsurdno što ne prisustvuje i sjednicama Parlamentarne skupštine Vijeća Evrope, jer se sve aktivnosti Parlamentarne skupštine Vijeća Evrope prvo odvijaju u komitetima između redovnih zasjedanja (kojih ima četiri). U komitetu se određuju izvjestioci, zauzimaju se stavovi zemalja i potom se svi dokumenti dostavljaju Parlamentarnoj skupštini Vijeća Evrope na usvajanje. Tako da je u konkretnom slučaju primjenjivanje ovog zaključka apsurdno, naglasila je gđa Čolo. U tom smislu dodala je da Komisija treba da prihvati izvještaj delegacije bez predlaganja konkretnih zaključaka.

Nakot toga, članovi Komisije jednoglasno su prihvatili Izvještaj o aktivnostima Stalne delegacije Parlamentarne skupštine BiH pri Parlamentarnoj skupštini Vijeća Evrope u 2008. godini i predložili Domu naroda Parlamentarne skupštine BiH njegovo usvajanje..

Ad.20. Razmatranje izvještaja o međunarodnim aktivnostima komisija i delegacija PSBiH:

- **Izvještaj s godišnjeg zasjedanja Parlamentarne skupštine Centralnoevropske inicijative, Kišinev, Moldavija, 18. 11. 2008.;**
- **Informacija o radnoj posjeti članova Zajedničke komisije za odbranu i sigurnost BiH Češkoj Republici, od 12. do 14.11.2008.;**
- **Informacija o radnoj posjeti članova Zajedničke komisije za odbranu i sigurnost BiH Ujedinjenom Kraljevstvu Velike Britanije i Sjeverne Irske, od 25. do 28.11.2008.;**
- **Izvještaj sa službenog putovanja u Kuvajt – Učešće na Trećoj globalnoj konferenciji parlamentaraca o borbi protiv korupcije, od 17. do 20.11.2008.;**

- Izvještaj s Trećeg plenarnog zasjedanja Parlamentarne skupštine Mediterana, Monako, od 13. do 15. 11. 2008.;
- Izvještaj s regionalnog okruglog stola "Odnos između parlamenata i javnih revizorskih institucija", Skoplje, 12. i 13. 12. 2008.;
- Izvještaj o zvaničnoj posjeti delegacije Predstavničkog doma PSBiH Parlamentu Bjelorusije, od 7. do 10. 12. 2008.

Na prijedlog člana Komisije Branka Zrne izvještaji o međunarodnim aktivnostima komisija i delegacija PSBiH razmatrani su zajedno, te je Komisija jednoglasno primila k znanju sve izvještaje.

Ad.21. Razmatranje Prijedloga izvještaja o radu Komisije za 2008. godinu

Članovi Komisije nisu imali primjedbi na Prijedlog izvještaja o radu Komisije za 2008. godinu, te je jednoglasno prihvaćen.

Ad.22. Razmatranje Prijedloga orijentacionog plana rada Komisije za 2009. godinu

Prijedlog orijentacionog plana rada Komisije za 2009. godinu jednoglasno je prihvaćen.

Ad.23. Tekuća pitanja

- **Molba Sektora za međunarodne odnose i protokol za dostavljanje okvirnog pregleda međunarodnih aktivnosti Komisije u 2009. godini**

Članovi Komisije, uvažavajući stav Kolegija za reduciranjem putovanja s ciljem smanjenja troškova, izjasnili su se da za 2009. godinu Komisija nije planirala službene posjete i putovanja.

U okviru tekućih pitanja, Komisija je razmotrila i zahtjev Ministarstva vanjskih poslova BiH za održavanje sastanka novoimenovanih šefova diplomatsko-kinzularnih predstavništava BiH. S tim u vezi zaključeno je da se Ministarstvu vanjskih poslova BiH predloži da se sastanak održi 28.1.2009., u vremenu od 9 do 10 sati, u zgradi Parlamentarne skupštine BiH.

Sjednica Komisije završena je u 13,45 sati.

Sekretar Komisije
za vanjsku i trgovinsku politiku,
carine, saobraćaj i komunikacije
Nenad Pandurević

Predsjedavajuća Komisije
za vanjsku i trgovinsku politiku,
carine, saobraćaj i komunikacije
Alma Čolo